

吳繼周 主編

中華道藏

華夏出版社

十五『國家重點圖書出版規劃項目』

主編 張繼禹

本冊主編 王育成

華夏出版社

中華道藏

第三〇冊

目錄

001 太上洞淵神呪經	一
002 太上洞淵神呪經(敦煌本)	八四
003 洞玄靈寶飛仙上品妙經	一一七
004 上元經(敦煌本)	一一九
005 太上洞淵北帝天蓬護命消灾神呪妙經	一二〇
006 太上洞淵辭瘟神呪妙經	一二三
007 太上洞淵說請雨龍王經	一二四
008 太上召諸神龍安鎮墳墓經	一二六
009 太上洞淵三昧帝心光明正印太極紫微伏魔制鬼 拯救惡道集福吉祥神呪	一二七
010 太上洞神洞淵神呪治病口章	一二九
011 太上洞淵神呪齋儀(敦煌本)	一四二
012 太上洞淵三昧神呪齋懺謝儀	一四六
013 太上洞淵三昧神呪齋十方懺儀	一五三
014 太上洞淵三昧神呪齋清旦行道儀	一五七
015 洞真太極北帝紫微神呪妙經	一六〇
016 太上元始天尊說北帝伏魔神呪妙經	一六四
017 太上北極伏魔神呪殺鬼錄	二〇五
018 北帝伏魔經法建壇儀	二一二

019 伏魔經壇謝恩醮儀	二一九
020 北帝說豁落七元經	二二三
021 七元真訣語驅疫秘經	二二七
022 七元璇璣召魔品經	二二九
023 元始說度酆都經	二三〇
024 七元召魔伏六天神咒經	二三二
025 七元真人說神真靈符經	二三六
026 太上紫微中天七元真經	二三九
027 北帝七元紫庭延生秘訣	二四一
028 上清天心正法	二四五
029 上清北極天心正法	二八二
030 上清骨髓靈文鬼律	二九五
031 天心正法修真道場設醮儀	三〇八
032 太上助國救民總真秘要	三一三
033 无上玄元三天玉堂大法	三八七
034 无上三天玉堂正宗高奔內景玉書	五〇七
035 太上說紫微神兵護國消魔經	五二〇
036 元始天尊說北方真武妙經	五二二
037 太上說玄天大聖真武本傳神呪妙經	五二五
038 太上說玄天大聖真武本傳神呪妙經注	五二九
039 太上玄天真武無上將軍錄	五八三
040 真武靈應真君增上佑聖尊號冊文	五八六
041 北極真武佑聖真君禮文	五八七

042	太上元始天尊說寶月光皇后聖母天尊孔雀 明王經	五九二
043	玄天上帝百字聖號	六一七
044	玄天上帝說報父母恩重經	六三四
045	玄天上帝啓聖錄	六三五
046	玄天上帝啓聖靈異錄	六九九
047	大明玄天上帝瑞應圖錄	七〇六
048	御製真武廟碑	七一五
049	上方靈寶无極至道開化真經	七一六
050	上方鈞天演範真經	七三八
051	上方天尊說真元通仙道經	七三九
052	上方大洞真元妙經品	七四七
053	上方大洞真元妙經圖	七五〇
054	上方大洞真元陰陽陟降圖書後解	七五四
055	上方大洞真元圖書繼說終篇	七五九
056	淵源道妙洞真繼篇	七六二

001 太上洞淵神呪經

經名：太上洞淵神呪經。撰人不詳。二十卷。底本出處：《正統道藏》洞玄部本文類。

太上洞淵神呪經序

唐引駕傳真天師特進檢校太傅光祿大夫行尚書戶部侍郎崇真館大學士上柱國彭城郡蔡國公弘教大師金門羽客文章應制內殿供奉三教談論廣成先生食邑五千戶實封一千六百戶賜紫杜光庭撰

西晉之末，中原亂罹，饑饉既臻，瘟癘乃作。金壇馬跡山道士王纂，常以陰功濟物，仁逮蠢類。值時有毒瘴，殞斃者多，閭里凋荒，死亡枕席。纂於靜室，飛章告天，三夕之中，繼之以泣。至第三夜，有光如晝，照耀庭中，即有

祥風景雲紛馥空際。俄而，異香天樂下集庭中，介金執銳之士三千餘人羅列，如有所候。少頃之間，珠幢寶幡，霓旌絳節，紅旗錦旆，相對前迎，白鶴交飛，朱鳳齊舞。又二青衣，持花捧香。又四侍玉女，擎持玉案。地舒錦席，前立巨屏，左右龍虎將軍，侍衛官吏各二十餘人，立屏兩畔，如有備衛焉。復有金甲將軍、諸大神王等，各數十人，次龍虎二君之外，班列肅如也。須臾笙簫駭空，自西北而下，五色奇光灼爍艷溢。有一人執簡佩劍，而前告纂曰：太上道君至矣。於是百寶大座自空而來，即見道君乘五色飛龍蓮花之座，去地丈餘，有二真人、二天師侍立焉。纂遂拜手，跼踵迎奉。道君曰：子憫生民，形于章奏，剗心泣淚，感動幽明，地司列言，吾得以鑑盼於子矣。纂匍匐禮謝畢。

道君曰：夫一陰一陽，化育萬物，稟五行爲之用。而五行互有相勝，萬物各有盛衰，代謝推遷，間不容息，是以生生不停，氣氣相續，億劫以來，未

始暫輟。得以生者，合於純陽，昇天而爲仙。得其死者，淪于至陰，在地而爲鬼。鬼物之中，自有優劣、強弱、剛柔、善惡，與世人無異也。玉皇天尊，慮鬼神之肆橫，災害於人，常命五帝三官檢制部御之律令，刑章罔不明備。然而季世之民，僥僞者衆，淳源既散，妖氣萌生。不忠於君，不孝於親，違三綱五常之教，自投死地。繇是六天故炁魔鬼等，與歷代敗軍死將，聚結成黨，戕害生民，駕雨乘風，因衰伺隙，爲種種病，中傷甚多，亦有不終天年，罹於天枉。昔在杜陽宮中，出《神呪經》，授真人唐平等，使其流布，以救於人。世間無知愚俗，見有王翦、白起之名，謂爲虛誕。此蓋從來將領者，生爲兵統，死作鬼帥，積功者遷爲陰官，殘暴者猶拘魔屬，乘五行敗氣，爲札爲瘥，然陽威憚之，神呪服之，自當殄戢矣。今以神呪化經，復授於子，按而行之，以拯護萬民也。即命侍童披九光之韞，以經及三五大齋之訣，授之於纂曰：勉而行之，陰功克充，仙階可冀也。言訖，道

君及侍衛衆真，皆西北而舉。纂遂按經品齋科行於江表，生民康乂，疫毒消弭。自晉及今，蒙其福者，不可勝紀。在乎蠲潔莊敬，惟精惟勤，明誠感通，應猶響答。若怠慢輕泄，自憊罪尤。修奉之人，慎遵斯戒伏。況此經浩博，元皇之金口親宣，其理淵深。

太上之微言密示，若有冥心諷念，精意誦持，香炷纔然，真靈立感，神兵騎吏應時而電掃姦妖，猛馬天驕隨處而風消毒癘。今此重求敏手，再啓勝因，極彫刻之能，盡濡染之妙，冀施行之不泯，俾流布以無遺。願國祚之延洪，更超周卜。祝聖年之遐永，克廣堯齡。車軌混於普天，正朔覃於率土。贊大道威神之德，助皇朝惠育之恩，洪福玄休，浩浩無極矣。

太上洞淵神呪經卷之一

誓魔品

道言：吾昔在三夭之上，爲諸男女說無量經，教化一切。時有下方世界真人蔚明羅等諸天大衆四十九萬人，到于三夭之上，聽說無量大經，內外交穩。明羅等發心更起，三禮太上，問訊：天尊教化難乎？弟子等區區，以展下情。太上曰：子從閭浮來乎？明羅等曰：然。太上曰：世間之人，詎有遵道奉經學仙者否？明羅等曰：世人積惡，不信道法。但聞有哭尸之音，不聞有仙歌之響。人民垢濁，三洞壅塞。百六之災，刀兵疫疾。魔王縱毒，殺害良善。門門凶衰，哀聲相尋。衆生相殘，自作苦惱。相牽而死，懷愚受苦，了不知出。此等之人，將何度之？太上聞明羅等說此語已，乃告諸天人曰：衆生何念？不知道法，不知其受，自共作惡，更相誹謗。三洞流

布，不知受持，亦如盲人遊乎日月。日月豈不明也？盲人不見。法師宣化，愚人不悟。太上將天人玉女八千萬億人，來下救之，過乎玉京。玉京山上一桃樹，樹高三百九億萬里，東枝覆東方，南枝蓋南國，西枝蔭西方，北枝蓋北國。四十九億萬年一花，八十億萬年結一子。子熟大如車輪，人一食之，三千年無飢也，鬼見此桃樹則自死矣。天人各各持此桃木，下以殺疫鬼，一切衆殍焉。

道言：自辛巳、壬午年，鬼兵縱洩，魔王行毒，毒病生民。我今遣四十九億禁官，攝三十六天魔王，來下共誓曰：自今以去，若國土之人，枉死、急病、刑獄、囚徒者，悉是魔王等不攝下鬼，使賊害種民也。自今以往，太上金口所勅，若有不禁者，令國土之人，遭其疫癘、刀兵、困苦、刑獄、囚徒、死亡不以理者，斯是魔王先坐不禁下鬼，故斬之，不恕也。太上乃遣十方主者四十九萬人、天女大梵王三千萬人布行，召三十六天一切魔王及小鬼王等八十億

萬，王妻子眷屬悉共惡誓，玄女麻姑王妃三千六萬人悉同來，爲太上勅魔王。魔王悉伏，各各遣魔子力士，巡行國界，擁護國中之人，恐太上誅之。九天梵子及天人大魔王，王及夫人綵女，悉三禮奉太上教矣。

道言：自伏羲以來，至于漢末，人民大樂，多不信道，悉受天炁自然邪魔。不知有道，不知有法，不知有經，直奉自然也。後時，有信經者少耳。大晉之世，世欲末時，人民無淳，苗胤生起，統領天下人民，先有多苦，上僥下急，然後轉盛，盛在江左，天人合集，道炁興焉。天運劫近，其中往往有得，值三寶無量上清黃庭記仙太素靈寶三昧者，此人等皆先世大福，福流後身。聞見此經，得度三河洪災之厄。善哉善哉，子等男女之人，若國王帝主，方伯二千石，下至愚人，不問奴婢，能及此經，受此契錄，名入仙品，終不枉死也。太上在玄景之宮，說此神呪經，九天大魔、羅刹鬼賊、諸天眷屬八億萬人，悉集在坐，聽天尊說法，各各檢手，

一心伏地。天尊乃爲演其記仙大經，四衆聞之，無不身上覺異也。

道言：汝等諦聽，吾今爲汝等，說來世劫盡之運。自伏羲三千年大水流溢，人民半死。三十六年，萬姓叛亂，自共相殺。至周秦之滅，人民頓無。及漢魏末時，人民流移，其死亦半。至劉氏五世子孫，紹其先基。爾時，四方替替，危殆天下，人民悉不安居。爲六夷驅逼，逃竄江左，人民隱跡，亦避地淮海。至甲午之年，人民還住中國，長安開霸，秦川大樂，六夷賓伏，悉居山藪，不在中川，道法盛矣。木子弓口，當復起焉。

道言：大劫欲至，治王不整，人民吁嗟。風雨不時，五穀不熟，民生惡心，叛亂悖逆。父子兄弟，更相圖謀，以致滅亡，怨賊流行，殺害無辜。當此之世，疫炁衆多，天下九十種病，病殺惡人。此有赤頭殺鬼，鬼王身長萬丈，領三十六億殺鬼。鬼各持赤棒，遊歷世間，專取生人，日月候之。青炁者人卒死，赤炁者腫病，黃炁者下痢，白炁

者霍亂，黑炁者官事。此鬼等持此炁布行天下，殺其愚人。唯有道士法師，受此神呪經，有九十億萬大神、自然力士、天人玉女，悉來侍衛。若有奉持供養者，萬病自消，終不橫死也。及鄰國有大賊來逼者，轉讀此經，賊自去矣。坐中男女，聞太上說此經，各各驚起三禮，弟子等願受此經。

道言：劫運垂至，人民多惡。其中有信道奉經者，悉是天人，非世間愚人。大聖見世間濁亂，遣天人來下，生乎中國，助時教化矣。天子大臣、公王令長及兵吏之中，雖處卑賤，一心信道，聞經信用，仙人導之。若聞見此經，不欲受持，將知此人六畜中來，與經無緣。是以大水之災，魚鼈所食，與泥同流，萬不出矣。

道言：自今以去，若男若女，聞見此經及有受持者，不問男女、奴婢、公私之人，有受之者，寫持經卷供養，生有利，仕宦日遷，疾病除愈，萬願從心。若有受持此經之人，三天大魔、九天大魔、三十六世之魔、十方殺鬼神

王、領鬼大王三十八萬人，各自勅：汝等下人，無得枉害受此經神呪之人。若今日世間有男女之人，疾病危急之者，法師將此經到家救病者，汝等鬼王收汝下鬼，一切勿令犯此主人。當爲和喻中外之神、家親丈人、殃殍嫉妬，分別解脫，使令病人得差，官事解散，三十六萬神守護病人。若不如吾言，汝鬼王等聽吾呪之焉。

道言：自今以去，若世人有疾病、官事、刑獄、囚徒、困苦，轉此經處，不蒙其福者，將是汝等鬼王之過耳。何以故？小鬼不信大法，縱暴凶心，汝等聽之。東來神，西來神，南來神，北來神，各三億萬徒。若有鬼王不承告下，縱放下人，來犯受經之人，及法師所救之身及其一門，故令遭毒者，斬此鬼等，令作萬分矣，不恕之。急急如律令。

道言：三天大邪王領四十八萬人，專行赤種。六天大邪王八十萬人，領七百萬人，專行白腫。九天大邪王、三天大邪王各六十萬人，將從三萬九

千人，專行黑腫。三十六天大邪王領七十萬人，專行黃腫。七天大邪王領九億萬人，專行青腫。緣人身體，流溢四肢，面目青赤黃白黑，乍寒乍熱，乍來乍去。引日沈困，氣來愴心。心下堅實，不欲飲食。飲食轉少，妨逆無味。或先世呪詛，考來逮人。如此罪緣，乃有官事、刑獄、過咎。當欲消者，先受經供養奉師。汝等如此之後，亦得昇仙耳。

道言：汝等大邪王，汝等先世無福，不信大道，作罪山積。今在邪中，專行瘡疾，毒苦萬姓。或有身體寒熱，反目白黑，狂走妄語，歌噪哭泣，四肢癱腫，惚惚鬥氣，如此之疾，流滿天下。或迷亂人心，令人遭公事，枉入刑獄，荼害萬民。如是之病，悉汝等邪王爲之。自今以去，奉佩此經契者，汝等助護之，莫令有惡。若轉此經之處，鬼兵遠之，善神祐護。若不信大法，故復來犯此法師者，汝等邪王入淵，汝等邪王入水，汝等邪王入火，汝等邪王萬斬，汝等邪王頭破作八十分，急攝汝精，攝

汝靈，不得干犯，尅害疫病，枉攬天下良善人民。急急如律令。

道言：大劫垂至，疫鬼流行。汝等道士，勤化愚人，令聞此經，令受此經契。受者，大水將來，九龍迎之，不有厄也。三灾垂及，三灾者，水火刀兵也。一切着汝等身，因汝等不知，不能得受此二十卷經，殺一切邪魔，邪魔不敢近人。但受此經，家中供養，不用宅籙。何以故？此經有無量仙人、玉女、天人、龍鬼常守護此經。有人久病，多凶少吉，衆事不利者，亦可奉持此經，能消一切大灾。有病受持者，萬事善矣。魔王及邪王，此間鬼王等，聞太上說神咒經，心中惻然，嘆曰：我等自昔以來，專行惡事，與道有反。今日聞天尊說此語，當奉行之。若有世人受此經者，亦自追逐護之。若有世間鬼賊，欲來侵欺此道士者，我當誅之耳。自今以去，有人疾病、官事轉經者，我等亦當助之爲福矣。若不存誓，故來犯者，頭破作萬分，不足以謝也。

道言：大劫將近，水流中國，天下

蕩除，人民死盡。唯有道士、受經之人，九龍來迎，天人百億，選擇善惡，汝等信之。若有人病，先考所加，受持此經。若有官事、刑獄，仍常有厄者，當受此經。若邪狂口舌萬端，亦受此經。一切不宜，亦受此經。受此經者，魔王不敢干人。

道言：五濁之世，世官撓急，不矜下人，下人吁嗟，萬民懷怨。天下悠悠，日月失度，五穀不成，人多流亡，大水皆起。有智之人，見經急受，書其經卷，竹箱筐笥，高座盛之。不爾者，亦可五色囊盛之。有能轉誦，鬼兵自散，官事解了。受此經者，一家一人受之，辟一門灾禍矣。縱使目不識字，但受之，雇人寫之，淨室供養，邪鬼自伏，一切不敢近人也。

道言：自今以去，轉此經處，若有疾病，官事口舌，宅中虛耗，聞此經誡，勅魔神呪。若一鬼不去，妄稱大神，山林社祀，世間廟主，壞軍死將，脫籍之鬼，來助邪王，病痛世人，不從大法者，十方殺神收而誅之。若復故來，縱暴

專行苦毒害者，鬼王等斬之，魔王等身作萬分，不得恕之。急急如律令。

道言：世促人惡，信法者少。大水來近，恐汝等沈溺死亡者衆，不知出期。吾念甚哀，故於玄景之宮九合之室，爲將來一切衆生，建其橋梁，開於法徑，示之以道，導之以法，令免三灾，消其九厄，去離八難，生天人中，昇仙之緣，世世無盡。勅下魔王，令安萬姓，預爲呪之，禁斷惡鬼。自今以去，有受持此經及轉讀之處，皆有一切福利。後世男女，若受經奉師者，亦得昇仙矣。

道言：五世之孫劉子，佐治天下，係紹仙基，大漢人民，多有值三寶者。何以故？此世世吉人，能起道心故也。山林隱士，不可稱數，見大劫欲盡，受經者十有七八矣。三灾垂及汝等，道士有緣之者，乃能信奉。太上爲一切衆生故，涕泣五行，汝等若信吾言者，九龍之輦輿來迎子身。若不信者，孟津三河，汝等着之。坐中男女三億萬人，悉來受此經矣。

道言：汝等受此經二十卷，供養行住持之，身中萬病自瘥，仕宦高遷，所願從心，亦可見當來真君。真君不遠，甲申灾起，大亂天下，天下蕩除，更生天地，真君乃出。真君既來，聖賢仙人及受經之者，一切來助，左右東西南北道士爲佐，無有愚人。汝等世人，但受此經，自然見真君矣。

道言：真君者，木子弓口，王治天下，天下大樂，一種九收，人更益壽三千歲。乃復更易，天地平整，日月光明，明於常時。純有先世，今世受經之人，來輔真君耳。是以智人道士，誘化愚人，令受此經，消一切疫病，鬼賊伏散，萬願自果，所向合矣。若受此經，所行之處，魔王助化，終不令人有惡也。

道言：男女道士有骨應仙者，得值此經。有其壽相應見真君者，得受此經。此經有神，令人心開。真君出世，無爲而治，無有刀兵、刑獄之苦。聖人治世，人民豐樂，不貪錢財。無有雞豚犬鼠牛馬六畜也，鳳凰白鶴爲家

雞，麒麟獅子爲家畜。純以道法爲事，道士爲大臣。男女貞潔，無有淫心。人民長大，亦不復是今之道士耳。不覺自異其形，端正長大。人長一丈三尺，真君長一丈六尺。面目光澤，人中無有姿醜了了，視之無厭矣。坐中大衆，聞太上說此真君，其國大樂，各各心中歡喜，悉自俱起，稽首三禮，弟子等亦當奉持此經耳。

太上洞淵神呪經卷之一

太上洞淵神呪經卷之二

遣鬼品

道言：吾在玄都九重宮中，爲諸大衆說《上清中玄妙經》。時有下方世界大神、通知識旬民子、八萬真人，俱來稽首，三禮而白天尊曰：世間人惡，不信至言，今有三洞經出，不知受之。疫鬼刀兵，殺害衆生，衆生死盡，故不求出。弟子等常恒見之，苦痛不忍聞之。國土今日政有行尸之人，無有道德之者。君臣相殘，父子相刑。道士行道，愚人競笑。自牽入惡，不務仙品。大劫垂至，亦不知之。疫癘惡炁，殺人略盡。弟子等不忍聞見，故來懇告。是時，天尊仰天長歎：悲哉，衆生不解大趣，不會修心，致招灾禍，疫癘所侵。吾今當遣天丁力士八億萬人，天驪直騎八億萬人，天禁大吏四十萬人，天殺大兵四十萬人，天蓬守士四十萬人，爲人遣此等之鬼。汝等持此

神呪經，布行國土。若有人受經者，疫鬼自去矣。

道言：自庚辰、辛巳、壬午、癸未年，近於甲申之歲，天下乃有九十二種疫病，病殺惡人。自非有道之者，難免此疫。此疫令人寒熱，頭痛目眩，五臟不調，心下切切，鼻口咽喉，聲歎腹滿，氣上刺心，手足拘急，胸背徹腦，耳又不聰，黃疸癰腫，身體赤黑，五種下痢。復有霍亂吐血，鼻衄癰膿，四肢碎痛，節節疼痛，氣熱驚走，悲思恍惚，中宵不眠，四肢反覆，口語無端，妄見神鬼，陰腫下癰，手足不整，卒死失性。如此之徒，悉是疫鬼來殺惡人。汝等若能佩奉三洞經法，吾遣天丁力士，令逐此鬼，不撓子等。水來不久，汝等衆生，速修善心，受傳經法，方免洪灾矣。

道言：自今以去，若有道士，心貪仙道，不求世榮，一切奉法，志味三洞，逐師入山，人間教化。如此之人，吾當遣天丁力士四十九億萬人，隨行覆護，所行出入，萬鬼不當。告魔王等，自今以去，勤爲衆生，遣一切疫鬼矣。

道言：甲申垂至，洪水不久。今有疫鬼殺人，世間多惡少善，衆生不識真言，三洞久布，不知求受，自招苦惱，當復奈何？衆生可愍，我今遣八部禁兵，祛殺疫鬼，遣令斥去，道士化人，令奉三洞矣。

道言：自今以去，有奉受此神呪經者，天上有三萬尉玄刃大兵，覆子等身。子等但爲衆生，日日教化一切愚人。愚人守迷，笑人行善，天遣疫鬼祛殺此人。如此等魂，俱入三惡道中，無有出期矣。

道言：辛巳、壬午年，有八千萬大鬼來滅惡人。兩舌誹謗道法，指師名諱，評論經典，不信三洞，不肯受道，如此之人，大鬼王來共滅之矣。

道言：自今以去，若有道士伏從三洞，行道救人之處。吾遣九天大兵九十萬億衆，一時來下，覆護子等。若有一鬼不去者，十方力士即來收之矣。

道言：自今以去，有道士轉此經處。天令三洞力士四十九萬人，六天力士八十萬人，三十六天大兵九十億

萬人，一合來下，共殺此疫鬼，令生人有病之者、官事之人，速得解脫，疾病輕差，和喻萬神，令家親歡喜。中外社竈，悉令分了，勿使枉撓生人。自非家祀之鬼，一切攘之，使永絕他方。若有不從吾令，鬼兵不去者，魔王等各當受斬，斬之不忍。汝等慎之，聖不虛言矣。

道言：此神呪經，乃有三十六天魔王，有七萬億小王，名字在經上。若道士轉此經之處，三十六天魔王，句盆子等七十二小王，悉來伏耳。是以有人能分末劫，受此神呪經家中供養者，一切惡鬼不得妄來。何以故？此一切大魔王遣力士來守此經，天人、玉女、仙人百億萬人亦來守護，不得有鬼兵敢妄來前後也。

道言：自今轉經之處，若有惡鬼凶神，敢復施惡意，來向此生人及法師之人者。鬼王等及大魔王八億萬王，自誓受三斬，頭破作三萬分矣。魔王曰：自今以去，若有道士治病轉經、經行作福者，當令所爲如意，萬願從心，

無圖不果。一旦違誓，弟子句民等，身受罪萬斬矣。

道言：自今三洞流布，真人悉受，況乎愚人。自今以去，有人奉此三洞經者，鬼兵助之，所作者成，所爲者合，大魔王護之。汝等道士，勤化愚人，若有受此，三洞之師遊行救度人間。若有急病，道士爲之轉經，讀此神呪，三天魔王召一切小鬼王，來助弟子之力耳。

道言：道士受此神呪經，不與餘經同受，別自單受此一部耳。何以故？此經中大魔王神力多故，故不得雜受，書寫亦別着一函盛之。行來佩之，萬鬼不近。作齋者，亦用無量科令矣。

道言：此神呪經，有一切鬼王名字，是以太上重之。有轉經之地，一切惡鬼不得近人也。自非生人所事家親、親鬼、丈人，不得妄來。中外大神，一切魍魎，生死之神，男女之殍，塚墓之鬼，自今以去，斥走萬里。若不如令，汝死萬斬，不忍之也。

道言：世有八萬溺身鬼，鬼長三尺二分，動有萬萬爲群，在水中殺人。不信道者，善神不護，亦枉死耳。復有九十八萬種水病，有三十二種黑病、白病、赤病、青病、黃病不可治，有三十六種卒死，此等病悉是罪人。世人不行道法，虐亂國土。是以天下惡人聚生，不肯念善，天遣力士萬病誅滅耳。若自今以去，有道士施其功德，建齋救人之處，魔王等悉助此法師，令治病瘥矣。若不瘥者，魔王高鄰子頭破作九十分矣。

道言：爾等一切魔王，若中國男女，自今以去，能有信道，受吾三洞，化行萬國，爲一切人治病轉誦之處。汝等爲化愚人，佐助作福力，迴風止雨，勿令近之。若能如此者，遷汝萬位。一旦背誓，子等頭破作九十分矣。

道言：一切神王及一切魔王等，汝亦與吾無爲正炁同矣。而乃汝等所爲，各有異耳，百分之中，不如我一也。汝等雖有大神通變，又復爲吾弟子。何以故？爲汝等不習自然道炁，久蘊

兇心，處於輪迴生死之域。爲汝宿世有於大福，故得神王、魔王之位。我乃位三天之上，總御衆靈。爲已宿劫以來，憐愍一切，如我所生。我之法律，能生善者，能成善者，能殺兇者，能絕惡徒，不但畜禽獸，善者爲良。今始有三洞大法，流行天下，國土善民往往有遇經法者，若有道士治病救人之處，汝等魔王助之作福，令其所願保全，勿斷其功德也。若一旦違誓，斬之不恕矣。

道言：天下有大神，多魔王爲久。汝亦與我無爲炁同矣。而汝等所爲有異，百分不如我之一也。汝等以伏爲我之弟子久矣，生死在我。我萬民悉在天地之中，多有不信道者。今有三洞之法流行天下，國土之人有值經者，若或有道士治病救人之目，子等助之焉，莫令斷其功德。若一旦違誓，斬之不恕矣。

道言：魔王八億萬王，有小王亦八億萬王，各各宣令，自今三洞行處，道士治病經行之處，汝等共助之。當令治病得差，所作者成，天人護之。風

雨有時，不令有害。若一旦違科，不敬聖言，縱其鬼兵，令枉殺善人、三洞法師，妄有危厄、疾病、苦惱，一切不如誓言者，魔王烏留子等三十六王，悉斬之不恕矣。

道言：國土之人，多不信大道。有受三洞者，汝等助之。爲令善心恒生，莫令善退。汝等護之，天人來助。自昔以來，人民病衆，不唯一種，千病萬病困苦。頭痛身重，手足不舉，恍惚吐下赤斑，令人氣病。吾悉知汝等之鬼名，曰慎憂哀子、角兒平王、阿信三業之人。千鬼萬鬼，急攝汝下鬼，令生人病瘥。若不瘥者，汝等頭破作八十分矣。

道言：甲子旬年，有七十二種病。長安索虜，暴殺人民。南楚喪失，流分他國。有二虜三吳，合來爭之。江左賢相，復佐天下。天下不樂，人民咨苦，下人憂悲。遊魂之鬼，日來取人，人民死盡。其中一人二人受法行道者，惡人共笑之。是以仙人不出，世間無有仙矣。

道言：甲戌旬年，國土之人，共流江左，紛遶長安。蜀漢之中，有赤鬼三萬，唯殺人民，爲人不信道。吾常使董玄珂、殷仲堪化天下愚人，愚人不信。奈何？天今遣百二十種病殺人。若有受三洞經法師，來爲轉此神呪經文，死人更生。吾常爲勅一切魔王及小王等，若有法師救病之處，悉令禁却小鬼，令生人病瘥。瘥者，令汝等得遷。不瘥者，汝等死矣。急急如太上口勅律令。

道言：甲申之旬年，世間有四十萬黑鬼殺人，多有橫死。到子丑之期，期日將至，有大殺赤兵八十萬衆，來取人民，人民不知。到壬午、癸未、甲申年，大水來滄，兵疫來集，大鬼王蔣公琰共來殺人。自今以去，小鬼來侵病人者，急去千里。若復不去，大魔王等頭破作八十分矣。

道言：甲午旬年，有三十六萬氏羌胡獠之鬼，來殺人民。赤鳥七十萬頭，飛行天下，人見者自然疫病，不可得治救。爲不信聖教，故以病死矣。

自今以去，國中有一人受經，轉此神呪經文之處，大魔王及天人來助，令生人自瘥。瘥者，令汝等上遷萬等萬倍。若復不瘥者，汝等大王及小鬼，斬之萬段不恕矣。

道言：甲辰之旬年，天下九十種病。人多暴死，六畜灾癘，爲人不信大道。有一人受經行道者，愚人笑之。是以天遣三萬九千大鬼來誅之，令世人有病，疫鬼多來殺人。若有法師轉此神呪經者，巨天力士八十萬億，俱來助之。若復不瘥，令人死者，大魔王先坐小鬼。急攝汝下鬼，勿犯良民。一告下，不恕之矣。

道言：甲寅旬年，有六十種病，死十分遺一也。王建領之，暴亂人民，有赤鳥之鬼。自今以去，有道士轉此經之地，令病人自瘥。若復不瘥，令人衰凶者，大鬼王先坐小鬼，頭破作四十九分矣。

道言：世間多惡人，聖所不居。時有一道士，建三洞之法，天人悉來護之。自今以去，若有病人危厄困篤之

者，大魔王斷其家殍小鬼，令病人自瘥。瘥者，大魔王等上遷。不瘥者，汝等斬身作萬分矣。世間有無極之小鬼，汝等各各自去，勿令生人死也。若不用吾教，今遣赤丁使者四十九億萬人，悉來殺大魔王等，不復恕矣。急急如太上口勅律令。

道言：壬午年十一月二十九日，至壬辰歲十月三日，有七十二萬小鬼王，專行入人宅中，行急疾病，人悉患之。李信、李陵二人，各領四十萬衆，來取人命。今已知汝名，汝急遠去。此有赤殺力士七十二萬人斬汝，汝不急走，身破萬分不恕之，急急去萬里矣。

道言：道士之法，以三洞爲先，受此神呪，乃得入山及於人間，殺一切鬼賊。不受此文，鬼不畏人。今有三千六萬暴鬼來殺人，吾知汝名，急去千里。急急如律令。

太上洞淵神呪經卷之二

太上洞淵神咒經卷之三

縛鬼品

道言：自今戊寅歲癸未之年，大劫之運，惡人不信道法，天遣疫鬼行七十二種病，病殺惡人。世間浩浩，鬼兵流毒。奈何，奈何。若有奉持三洞之人，吾當遣力士四十九萬人，爲此法師縛枉橫之鬼，若道士救人經行之處，魔王等當助道士，縛此鬼兵等矣。

道言：三天玉女與大梵天王夫人等八千萬人，來下聽經而自誓言曰：自今以去，天下之人，若有此三洞法師作齋救人，轉此神咒經之處，我等當護之，不令疫鬼一切邪精來干犯法師也。若不去者，我等先坐矣。爾時，九天大魔王并及玉女八十億萬人，亦俱來下，白太上曰：自今以去，若有道士轉此經文救人疾病之處，若有殺鬼故來撓之，不肯去者，我等當共縛之，令法師不亂，病人得瘥。得瘥者，我等之力，

衆聖亦喜。魔王等各自誓，縛疫鬼矣。

太上爾時乃說偈曰：

吾今說神呪，呪神皆滅形。所誅自有主，爲惡不相聽。汝等既伏誓，共來聽吾經。自今當助道，一一相經營。勿復相吹噓，共作妖惡情。若作妖惡情，力士縛汝靈。湯煮火復燒，往返刀山亭。汝若從善者，亦不苦相征。

道言：壬午年有赤鬼三萬九千人，來殺惡人。有人值此三洞法師者，疫鬼斥去千里。若自今以去刑獄疾病，但轉此經，此經有八十萬大神、三萬力士、四十萬玉女、三十萬童子，一切來共守之所轉經之處，鬼兵與魔王來縛此疫鬼矣。

道言：吾昔在五嶽玄景宮中，爲一切衆生說三昧經。時有七天魔王三十萬人，一合來下，自誓言：自今以去，若有法師得救病人之處，轉此神呪經救人，我當爲開道，不令有惡，惡鬼遠走，天人來助。可治之，令疾病除瘥，刑獄之人悉皆解脫。若復無益者，

我等自受腰斬，死亦不恨矣。

道言：自壬午年辛巳後，必有疫癘之鬼八千萬人，來殺惡人，惡人不信道。故三天玉女、九天大梵王三十六萬人，一合來下，啓太上曰：自今以去，若有法師經行之處，我等亦當護之，令疾病者愈，官事之人速得解了。若疫鬼復來圖害良民者，我等亦當縛之耳。

道言：自今以去，有奉三洞之人者，九天大兵七十萬人，三十六天魔王七十萬人，各來護此法師也。若今有疾病、官事之家，急轉此經，此經有大神力，自令官事散了、病人自瘥。若有不伏者，三天魔王自來縛之，疫鬼赤兵自然死盡，中外殃咎、男女之鬼斥去萬里，十方力士覆護法師矣。

爾時太上乃說偈曰：

三洞大乘法，真道理自陳。若非積劫緣，無由得授聞。轉讀救黎蒙，消滅衆鬼羣。天真相擁護，妖精莫敢前。若有犯法者，身破成百分。

又偈曰：

大象本無形，經言即爲道。道轉無形中，妖魔靡不掃。清濁各有分，天官來相考。念子爲兇逆，使我常悲惱。反縛裂子頭，劍樹令汝抱。

道言：今觀世間，惡人聚生，六夷交侵，自共相殘。至壬午年，天下浩浩，人民不安，刀兵疫癘，殺害惡人。惡人不信大法，故令死耳。自今有奉三洞之經者，自得上仙耳。世人愚癡，見道士亦死、惡人亦死，不知分別有異，直見同死，無有異爾也。惡人死者，入三塗惡道。道士死者，生天上人間，或爲大王，若便仙去，終不生惡處也。或白日上仙者，千年服藥，先著年華也。若有奉三洞尊師受經，苦身行道，得昇此仙，萬劫無有死矣。自今以去，若有道士救人之處，魔王等共收縛鬼精矣。

道言：吾昔爲中國仙人東嶽直連子等三萬人，各各持信受經之具，上山作壇，拜謁五方五帝。與之爲信，乃折銀環一具，以券分之。與師飲丹，自約誓曰：今日飲丹，受經供養，終身不

犯。有疾病急厄，宅中不利、口舌官事、刑徒在獄者，爲其轉經作齋。悉依齋法清淨，道士以此爲常。仙人等以授受經，化行國土，爲萬民治病，一切鬼王悉皆潛伏。

道言：世人多不信道，有一人受經，衆共笑之。謂曰：妖魅不欲生活，入山避人，不求生官。不知此人天上生來，見世間濁惡，自求仙道，度一切人。人不識真，反更笑之。奈何，奈何。如此人等，後有重罪，罪入赤連地獄水火之中，三千億劫，無有出期。罪畢作人，有人之形，無人之情。或癡聾瘖瘂，不知人事。復作六畜，食草飲水，以肉供人。生便艱苦，苦無所告。此之罪人，輪還如此，無有出期。子等思吾言矣。

爾時太上乃說偈曰：

頑逆不知法，見世積罪人。不但自不信，反笑他習真。不知天上來，不久在人羣。子等無所識，相與共評論。言出禍亦入，響應須臾間。死受荼毒報，罪結在赤連。轉輪五苦中，考對億

劫年。出生無人情，六疾所縈纏。身設六畜形，詎復識形神。罪非修大乘，何由免形殘。因緣自如是，子等思吾言。

道言：世人多有惡心之者，不信真言。天遣橫行伐殺將軍八千萬人，仍遊天下，取此惡人。今有奉三洞之人，魔王三千人護之也，隨逐覆救。若欲作齋，齋集之日，爲其明朗，不令風雨，天人助之。若道士行處，人見愛樂，道炁盈溢，不令病痛也。苦惡人罵辱道士，爲作口舌縣官欺圖者，即爲收其魂魄殺之，以明大道有神之驗也。急急如律令。

道言：世有烏丸鬼王，身長七尺，八尺，各有九千萬人赤兵，月月下來，取人炁命，令天下人枉死。甲戌、甲午旬中，仍下來取人命，行三萬九千種病，病殺人小口男女。自今以去，有道士轉此經處，汝等收汝下兵，令斥去萬里，若不去者斬汝，烏丸三億萬人敢不從之矣。

道言：甲辰之旬，有八千九天大

魔王威都等，將下人無數，月月病人，下九千種病，病不可治，與下土死將鬼兵合來殺人。自今以去，攝汝鬼兵，勿枉善民也。若有道士男女之官行道之處，汝等助之。若不用吾教者，子等頭破作八十分矣。

道言：辛巳、壬午年，人民橫死，天下不安，死者衆多。鬼王烏丸與地下赤炁殺人，人多瘟病，病者門門，十有三四死矣。奈何，奈何。唯有村村大會清齋，拜謁五帝之神，自保家口，令天神知之，鬼王烏丸自伏，不復殺人矣。

道言：自奉受此經，師爲開示，有病作齋。及官事刑徒，宅中多鬼，仕宦不遷，田蠶不收，悉作此齋耳。作此齋天人來護，即得心願，萬無不利矣。奉此經者，鬼王自伏也。自今以始，若有此三洞法師所施行之處，鬼王護之。若有道士疾病者，汝等鬼王頭破作八十分矣。

道言：庚辰之年，國主自慎，大臣相輔，天下浩浩，無不畏也。小人相

苦，貴人無道。天下九十種病，病殺惡人。鬼王名壇支，領三十六鬼王等，七天大魔王明主之，下行萬病，病不可治。當爾之時惡人多，多有不信道。受經者，其有受三洞者，大魔王等四十九億萬人悉來下護，助此法師耳。

道言：此三洞法師，入人門戶宅中，萬鬼避之，治病救民，無不瘥也。惡人多故，故令鬼殺人耳。太上多哀，哀念一切衆生，特爲呪此鬼王等，令攝萬毒耳。自今以去，若道士有厄有病者，此鬼王等頭破作八十分矣。

爾時太上乃說偈曰：

道法真中真，真中復有靈。三洞入人門，萬鬼皆滅形。妖邪僞且濁，道性本來清。救護一切人，普濟於衆生。太上布大慈，消却天魔兵。萬毒自攝炁，不得馳汝精。頭破八十分，送汝付天丁。天丁相剪截，罪招非恕情。太上無彼我，分別使法明。

道言：世多愚人，聖人不教之耳。自今大水來，近刀兵之厄，國中不信道，枉攬萬民。萬民憂苦，不勤不知，

唯告太上。恐鬼王枉殺，天下善人盡，乃說三洞之經，化行天下。自今以去，若有枉厄道士者，吾當助之，不令道士有刑獄、口舌、疾病也。若一旦不如法者，大魔王拘民、鬼王烏丸等百萬衆，頭破作十二分矣。

道言：天下之人，自壬午年受道者，三萬九千人。青州、秦川男女得仙者，王方、張玄、杜軌、蜀漢、羅道安、費頭然、李英、張石、孫洪媚、侯進、袁道此人等，甲申之年乃得仙也。鬼王各各護助此三洞之人，不令疾病也。若人有忿怒法師、罵辱欺打、圖謀殺害者，此人等悉令身亡滅門，七劫無形，託風倚雨，依塵附草，令萬劫乃復人身。鬼王等護助此三洞法師，若有不信吾言者，大魔王拂旦、烏丸，悉頭破作九十分矣。

道言：三十六王大魔之鬼，自國人不信，有奉三洞之者，天上來也。大魔王及鬼子，一切護之。若道士作齋救治百姓者，汝等爲却惡炁，令道士治病速瘥。自今以去不伏者，烏丸大鬼

王等，悉頭破作八十九分矣。

道言：門戶之鬼名承伯，開閉之鬼名阿倫然，井竈之鬼名真連子，四籬之鬼名士伯供，道上之鬼名烏子丁，舍宅之鬼名玄子都，一合來下，遠人舍宅萬重，不爲一人，殺害萬民來久。自今以去，斥遠萬里，若欲來疾病人□者，鬼王等頭破作十二分矣。

爾時太上乃說偈曰：

告汝門戶鬼，爰及井竈神。籬上行□者，汝莫犯良民。汝欲作惡者，風力解□身。但當助道化，斥却邪鬼君。莫復泄□心，招換尸殍群。汝若伏誓者，時時當相申。如其不從令，令汝身首分。

又偈曰：

大道自然法，賞善而罰逆。罰逆逆即消，勿令與道隔。汝雖欲作惡，正法必科責。威仗擁天兵，誅剪諸邪僻。汝其自去者，可得免斯厄。

道言：世有十萬赤連鬼，鬼長三尺六寸，百萬人。有三十萬長頭鬼，手提赤棒，棒殺萬民。自及壬午年壬辰

之歲殺人，大水來矣。國王不治，民多暴死，甲申之灾死絕矣。奈何，奈何也。道士化愚人，令受三洞，可得脫免九厄之中耳。

道言：天下亂矣，人民死盡，多是鬼王殺人。善人不死，惡者入三塗。自今有枉死者，天亦助之耳。自今以去，有作道士三洞法師者，大魔王護之。若令道士危厄疾病者，鬼王等負罪，頭破作八十分矣。

道言：鬼王自今以去，不得枉殺萬民。若道士經行之處，救療病人，當助治之，莫令不瘥。若不瘥者，不用吾言，枉殺善人，汝等頭破作百二十分矣。急急如太上口勅消灾護人律令。

太上洞淵神呪經卷之三

太上洞淵神呪經卷之四

殺鬼品

道言：自伏羲以來，壞軍敗將，舉衆形殘，刀兵腥死，萬萬爲羣。或有露尸，骨節分張，身首他處。或飛或揚，精神不得集聚。或有身無頭，有足無手，有口無目。千千萬億，遊託自守。依山倚木，取人年命。人不備知，怪亂人心。動欲作祟，崇耗田蠶，凡百不利。惱人家親，張生異端。令生人大小疾病，六畜暴死，口舌官事，水火數起，令人不吉。此都是汝等世間客死之鬼，與雲中李子敖，浮遊雲間，來往海濱，東西南北，乘風駕雀，捉人雞犬。鳥獸妄作妖怪，天橫生人，求其血食。俗師所占，恐怖生人，卜言家親，共作其禍，遂生俗道。汝等小鬼聞之，因便承峻放石，無有不下，以凶重加，無往不衰，害人元元。自謂：汝等如是以來，世人枉死者半。自今以去，大魔王